

Inspira^{Inside}

TERKINI DI UPSI



UNIVERSITI
PENDIDIKAN
SULTAN IDRIS
الجامعة الإسلامية
سليمان إدريس

SULTAN IDRIS EDUCATION UNIVERSITY

Bil 8: 23 Februari 2026

UPSI universiti awam pertama santuni mangsa di Pidie Jaya, Banda Aceh

Aceh, 19 Februari - Universiti Pendidikan Sultan Idris (UPSI) melakar sejarah baharu dalam misi pengantarabangsaan apabila menjadi universiti awam pertama yang tampil menyantuni dan menyalurkan bantuan kemanusiaan kepada mangsa banjir di Pidie Jaya, Banda Aceh. Langkah proaktif ini dijayakan menerusi gabungan strategik dua entiti utama universiti iaitu Fakulti Pembangunan Manusia (FPM) dan Pusat Alumni UPSI yang menggabungkan misi pengantarabangsaan akademik serta program Kembara Santuni Alumni Antarabangsa di wilayah Aceh yang melabuhkan tirainya semalam. Timbalan Dekan FPM, Prof Madya Dr Abdul Halim Masnan berkata inisiatif ini adalah manifestasi keprihatinan seluruh warga UPSI terhadap nasib saudara serumpun yang masih dalam fasa pemulihan pasca musibah.

Kehadiran delegasi UPSI disambut dengan penuh rasa syukur oleh penduduk, katanya, memandangkan sumbangan berupa pek keperluan asas harian itu diserahkan terus kepada keluarga yang terjejas bagi meringankan beban kelangsungan hidup mereka khususnya sebagai persiapan menyambut bulan Ramadan yang bakal tiba. Menurut beliau kehadiran mereka sebagai universiti pertama yang menjejaskan kaki ke kawasan ini untuk misi bantuan adalah satu tanggungjawab bagi memastikan saudara di situ tidak terpinggir daripada menerima sokongan moral dan material.

Manakala dalam sesi berasingan yang berlangsung di Universitas Syiah Kuala (USK) menyaksikan keprihatinan UPSI apabila menyerahkan sumbangan wang tunai berjumlah RM10,000 khusus buat bekas pelajar universiti tersebut. Katanya, sumbangan tersebut diagihkan kepada alumni yang terkesan akibat bencana bagi meringankan beban kewangan yang ditanggung oleh mereka.

Selain itu, delegasi UPSI turut memanfaatkan keberadaan di USK sepanjang lima hari lawatan untuk menjayakan rangka kerja akademik menerusi penganjuran Seminar Antarabangsa

bertemakan Menguatkan Fitrah Anak Usia Dini Melalui Konseling dengan kerjasama Himpunan Mahasiswa Bimbingan dan Konseling (HIMA BK) dan HIMA PAUD (Pendidikan Anak Usia Dini), Fakultas Keguruan dan Ilmu Pendidikan (FKIP). Seminar ini menjadi platform strategik bagi mempromosikan program pascasiswazah UPSI dalam usaha menarik minat lebih ramai pelajar dan tenaga pengajar Indonesia melanjutkan pengajian di Tanjung Malim.

Sementara itu Pusat Alumni UPSI meneruskan agenda memperkasakan jaringan menerusi sesi pertemuan bersama 45 alumni UPSI yang kini berkhidmat di Aceh bagi tujuan pengemaskinian data profil kerjaya dan pangkalan data alumni. Delegasi turut mengadakan sesi Ziarah Kasih ke Sekolah Dasar Islam Terpadu (SDIT) Bayyinah Tahfizul Qur'an yang menyingkap pencapaian membanggakan apabila mendapati institusi pendidikan tersebut dimiliki dan ditadbir sepenuhnya oleh alumni UPSI sekali gus membuktikan kualiti kemenjadian graduan UPSI di pentas antarabangsa.

Beliau berkata sinergi antara FPM dan Pusat Alumni dalam misi itu membuktikan UPSI mampu bergerak sebagai satu pasukan yang ampuh dalam mengimbangkan peranan menarik kemasukan pelajar antarabangsa serta menyantuni kebajikan komuniti serantau menjelang bulan mulia, Ramadan.



PENERAJU KEBITARAAN PENDIDIKAN



12th Batch NIHONGO Partners Immersion Programme 2026 Perkasa Pengalaman Budaya dan Simulasi Kehidupan Sebenar

Tanjong Malim, 15 Februari - Universiti Pendidikan Sultan Idris (UPSI) melalui International, Mobility and Advanced Education Centre (IMAC) dengan kerjasama The Japan Foundation Kuala Lumpur (JFKL) telah menganjurkan 12th Batch NIHONGO Partners Immersion Programme 2026 yang berlangsung selama tiga hari bermula 13 hingga 15 Februari 2026 bertempat di Scholar's Suites UPSI.

Program ini menghimpunkan seramai 20 orang peserta Nihongo Partners (NPs) daripada Jepun sebagai platform latihan dan pendedahan intensif terhadap budaya, kehidupan sosial serta persekitaran pendidikan di Malaysia. Program ini diadakan bertujuan memberikan pencerahan mengenai bahasa Melayu, budaya dan gaya hidup masyarakat tempatan kepada NPs yang bakal berkhidmat sebagai pembantu guru di sekolah menengah terpilih di Malaysia.

Hari pertama program dimulakan dengan sesi taklimat dan aktiviti suai kenal sebelum diteruskan dengan Classroom Simulation yang memberi peluang kepada NPs memahami suasana pengajaran dan pembelajaran dalam konteks tempatan. Peserta turut didedahkan kepada permainan klasik Malaysia

seperti Batu Seremban, Congkak, Xiangqi (Chinese Chess) dan Teng Teng sekali gus memperkukuh kefahaman silang budaya. Sebelah malam, majlis makan malam alu-aluan diadakan di Easy Café, Tanjong Malim bagi meraikan kehadiran peserta. Pada hari kedua, peserta mengikuti sesi pemasangan aplikasi penting bersama Buddies UPSI serta menjalani aktiviti simulasi kehidupan sebenar menerusi *Real-Life Survival through Simulation*. Antara aktiviti menarik ialah pengalaman membeli-belah barangan keperluan di TMG Mart serta pendedahan kepada suasana pasar malam Tanjong Malim melalui aktiviti My 1st Experience at the Night Market. Aktiviti ini memberi peluang kepada peserta merasai sendiri pengalaman budaya masyarakat tempatan secara autentik. Hari terakhir program diisi dengan sesi latihan persembahan sebelum berlangsungnya Majlis Penutup yang menampilkan persembahan NPs, sesi penyampaian sijil, pertukaran cenderamata serta sesi fotografi kenangan. Majlis penutup telah disempurnakan dengan ucapan penutup daripada Prof. Dr. Che Zalina Zulkifli, Timbalan Pengarah (Strategik dan Pengantarabangsaan Akademik), IMAC dan Tuan Tsukamoto Norihisa, Pengarah JFKL.

MMK KHAR Anjur Bengkel Penyelarasan Takwim Aktiviti dan Hala Tuju Kolej Harun Aminurrashid 2026

Port Dickson, 15 Februari - Majlis Mahasiswa Kolej Harun Aminurrashid (KHAR) telah berjaya menganjurkan Bengkel Penyelarasan Takwim dan Hala Tuju KHAR Tahun 2026 yang berlangsung dari 15 hingga 17 Februari 2026 bertempat di Institut Latihan FAMA, Port Dickson.

Aktiviti ini bertujuan untuk melaksanakan penilaian komprehensif terhadap program-

program yang telah dijalankan sepanjang tahun 2025 bagi mengenal pasti tahap pencapaian, kelemahan serta peluang penambahbaikan. Penilaian ini penting bagi memastikan setiap program yang dirancang dan dilaksanakan memberikan keberkesanan serta impak yang optimum untuk pelaksanaan program pada masa akan datang.



Delegasi UPSI ke Universitas Shah Kuala, Aceh Perkukuh Kerjasama Antarabangsa

Indonesia, 16 Februari - Delegasi daripada Universiti Pendidikan Sultan Idris (UPSI) telah mengadakan lawatan rasmi ke Universitas Syiah Kuala (USK), Banda Aceh, Indonesia bagi tujuan promosi institusi serta memperkukuh jaringan kolaborasi akademik antara kedua-dua universiti.

Lawatan ini menjadi platform penting dalam mempererat hubungan strategik serantau, khususnya dalam bidang pendidikan awal kanak-kanak dan kaunseling yang sentiasa berkembang dari semasa ke semasa. Selain itu, delegasi UPSI turut mengambil kesempatan untuk memperkenalkan program akademik dan mempromosikan peluang pelajar yang boleh diterokai bersama warga akademik serta mahasiswa Universitas Syiah Kuala.

Seramai lapan orang mahasiswa, tiga orang pegawai dan seorang pensyarah daripada delegasi UPSI yang terlibat dalam lawatan ini. Antara pengisian utama program ialah Seminar Internasional hasil kolaborasi antara UPSI bersama Himpunan Mahasiswa Bimbingan dan Kaunseling (HIMA BK) serta Himpunan Mahasiswa Pendidikan Anak Usia Dini (HIMA

PAUD) Universitas Syiah Kuala.

Seminar bertajuk "Menguatkan Fitrah Anak Usia Dini Melalui Konseling di Tengah Krisis Keteladanan" ini menekankan kepentingan membina sahsiah dan fitrah kanak-kanak sejak usia awal melalui pendekatan kaunseling yang holistik. Perbincangan ilmiah yang berlangsung mendapat sambutan hangat daripada mahasiswa dan pensyarah kedua-dua institusi. Para pembentang berkongsi perspektif mengenai cabaran krisis keteladanan dalam masyarakat masa kini serta peranan pendidik dan kaunselor dalam membentuk generasi berakhlak dan berdaya tahan.

Profesor Madya Dr. Abdul Halim Masnan menyatakan tentang pentingnya menjadikan AI sebagai pembantu. Beliau berkata "Robot tidak memiliki sifat manusiawi, insaniah yang ada pada manusia". Satu sesi perkongsian temu ramah yang dikongsi oleh alumni di bawah tajuk 'Sekapur Sirih dan Temu Ramah Alumni UPSI' turut diadakan bagi menelusuri pengalaman graduan yang pernah menimba ilmu dan menyambung pengajian serta terlibat dalam

program di Universiti Pendidikan Sultan Idris.

Isi kandungan pengalaman merentas budaya ini sedikit sebanyak dapat meningkatkan kompetensi profesional berkeyakinan diri dalam bidang pendidikan. Di samping itu, kerjasama antara kajian akademik dengan pusat institusi dalam sesi ini jelas memperlihatkan impak positif dan berkesan bagi melahirkan para graduan yang mampu berdaya saing tinggi hingga ke peringkat antarabangsa.

Tambahan pula, program diteruskan dengan sesi perkongsian pengalaman wakil daripada mahasiswa UPSI di mana berkongsi pengalaman pembelajaran, aktiviti kokurikulum serta peluang pembangunan sahsiah yang ditawarkan di UPSI. Sesi ini membuka ruang dialog dua hala, membolehkan mahasiswa UIN Ar-Raniry memahami dengan lebih mendalam suasana akademik dan kehidupan kampus di Malaysia. Perkongsian ini turut memberi inspirasi kepada mahasiswa untuk meneroka peluang mobiliti antarabangsa dan memperluas jaringan akademik merentas negara.



Bagan Datuk
UPSI Kongsi Kepakaran Penternakan Lebah Kelulut di Sungai Sumun 1, Bagan Datuk



Acheh
FPM Prihatin Cakna Sampaikan Bantuan pada Mangsa Banjir Aceh



Kuala Lumpur
Retreat Portfolio Bendahari



Tanjong Malim
Penyerahan Kad Korporat UPSI kepada Wellness Cafe Fakulti Pembangunan Manusia